

ՄԵՐՉՍԵՎԱՆՅԱՆ ՑԵՂԵՐԻ ՄԻՈՒԹՅՈՒՆԸ
ՀԱՅԿԱԿԱՆ ԼԵՌՆԱՇԽԱՐՀԻ ՀՅՈՒՍԻՍ-ԱՐԵՎԵԼՔՈՒՄ
(մ. թ. ա. VI—V դդ.)

Ս. Գ. ՊԵՏՐՈՍՅԱՆ

Ուրարտական արձանագրություններում մ. թ. ա. 784 թ. սկսած բազմիցս հիշատակվում են Սևանա լճի ավազանում գտնվող Ueduri-Etiuni ցեղամիությունը և նրա մեջ մտած առանձին ցեղային երկրները: Վերջիններիցս ուրարտացիներին քաջ հայտնի էին «ծովից այսկույս» գտնվող այն շորսը՝ Uelikuni (Uelikuhi), Lueruni, Adahuni և Arququni, որոնք գրավում էին լճի արևմտյան և հարավային ափամերձ շրջանների մեծ մասը¹: Սրանցից բացի, գոյություն ունեին «ծովից այսկույս» գտնվող 19 ուրիշ ցեղային երկրներ ևս², որոնք տեղագրվում են Հայկական ՍՍՀ Վարդենիսի, Կրասնոսելսկի և Շամշադինի շրջաններում, ինչպես նաև Ադրբեջանական ՍՍՀ արևմտյան մասում³:

Մ. թ. ա. VIII դարի ընթացքում ուրարտական զորքերի կատարած մի շարք ավերիչ-ավարառուական արշավանքներից հետո Ueduri-Etiuni ցեղամիությունը թուլանալով, մասնակիորեն հպատակվեց Վանի թագավորներին⁴: Սակայն կարճ ժամանակ անց՝ մ. թ. ա. VII դարի սկզբին, մերձսևանյան ցեղերի այս միությունը որոշակի հաջողությունների էր հասել իր անկախության վերականգնման գործում: Ուրարտուից ունեցած իր կախվածությունը թոթափելուց հետո նա հզորացման մի նոր շրջան թևակոխեց Ռուսա II-ի (684—645) գահակալության տարիներին, երբ վերջինիս զորքերը իարխվել էին ոչ միայն Սևանի ավազանում, այլև արևմուտքից նրան հարող ցեղային այն երկրներում, որոնք նախկինում գտնվում էին ուրարտական տիրապետության տակ⁵: Այս հանդամանքը նպաստավոր հանդիսացավ մերձսևանյան ցեղամիության աստիճանական ընդարձակման համար, որ իր առավելագույն չափերին հասավ հաջորդ՝ մ. թ. ա. VI—V դդ. ընթացքում:

Ueduri-Etiuni ցեղամիության նոր հզորացումը Ուրարտական պետության թուլացմանը և մինչ այդ նրա կազմում եղած հյուսիսային մի շարք ցեղային երկրների անջատմանը զուգընթաց տեղի ունենալու կապակցությամբ անհրաժեշտ ենք համարում մեջ բերել Ն. Վ. Հարությունյանի հետևյալ եզ-

¹ Դ. Ա. Мелликишвили, Урартские клинообразные надписи, М., 1960, 266, տող 4—5 (այսուհետև՝ УКН); Դր. Капанцян, Историко-лингвистические работы, т. II, Ереван, 1975, էջ 33—34, 80—83; Н. В. Арутюнян, Бнайнили (Урарту), Ереван, 1970, էջ 200, 243, 263—265:

² УКН, 266, տող 6—12:

³ Н. В. Арутюнян, Бнайнили, էջ 281—282:

⁴ Б. Б. Пиотровский, Ванское царство (Урарту), М., 1959, էջ 30—32; Н. В. Арутюнян, Бнайнили, էջ 280—282:

⁵ Н. В. Арутюнян, Новые урартские надписи Кармир-Блур, Ереван, 1966, էջ 38—39, նույնի՝ Бнайнили, էջ 434—435:

րափակիչ տողերը. «Այսպիսով, չնայած Աղա երկիրը (Արարատյան դաշտի ձախափնյակը—Ս. Պ.) իր էրեբունի, Արգիշտիիսինիի և Թեյշեբաինի նշանավոր կենտրոններով մնում էր Բիայնի-Ուրարտուի տիրապետության տակ՝ ընդհուպ նրա անկումը (590 թ. մ. թ. ա. չ.), այնուհանդերձ պետք է ընդունել, որ դեռևս Արգիշտի II-ի՝ Ռուսա II-ի հոր, ժամանակներից սկսած Ուրարտուի դիրքերը հյուսիս-արևելքում ևս նշանակալիորեն թուլացել էին։ Արգիշտի II-ը և Ռուսա II-ը, հավանաբար, այստեղ սկսել էին կորցնել տարածություն տարածության ետևից, այն է. Ազալից հյուսիս-արևելք մինչև Սևանա լճի ավազանն ընկած երկրները։

Ուրարտուի թուլացմանը և Ուգուրի-էթիունյան դեղերի միության ուժեղացմանը զուգընթաց Վանի թագավորությունը հյուսիս-արևելքում, հավանաբար, ամփոփվեց Աղա երկրի տերիտորիալ սահմաններում։ Այնպես որ, մարա-սկյութական հարձակման ժամանակ Աղա երկրի անվտանգությունը, ըստ երևույթին, չէր ապահովվել նաև հյուսիսից՝ Ուգուրի-էթիունիի կողմից։

Թեյշեբաինի կառուցումով Ռուսա II-ը, ակներևաբար, մտադիր էր ոչ միայն հետագայում ևս իր տիրապետությունն ապահովել Աղա երկրում, այլև ամրապնդել տարեցտարի թուլացող Ուրարտական պետության թիկունքը հյուսիս-արևելքից»⁶։

Որ մերձսևանյան Ueduri-Etiumi ցեղամիության հզորացումը ուղեկցվում էր նրա տարածքային ընդարձակմամբ, ցույց է տալիս Քիեխունի երկրի օրինակը։ Արարատյան դաշտի և Սևանի ավազանի հյուսիս-արևմտյան մասի միջև (այժմյան Հրազդանի շրջանը հարակից հողերով) տարածված ցեղային այս երկիրը Ուրարտական պետության թուլացման նույն այս ժամանակաշրջանում դուրս գալով նրա տիրապետության տակից՝ շուտով ընդգրկվում է մերձսևանյան ցեղամիության մեջ⁷։

Մ. թ. ա. VII—VI դդ., Ուրարտական պետության թուլացման ժամանակաշրջանում, մերձսևանյան ցեղամիության տատիճանական հզորացման և Սևանի ավազանի անձուկ սահմաններից դուրս գալու իրողությունը ենթադրել է տալիս, որ ցեղամիությունն իր հզորացման նոր փուլը թևակոխել էր նրա մեջ մտած ցեղային երկրներից մեկի շուրջ մյուսների համախմբման շնորհիվ։ Իսկ թե մերձսևանյան հայտնի 23 ցեղային երկրներից ո՞ր մեկը կարող էր լինել դա, մեզ հուշում է հետևյալ փաստը։

Uelikuni ցեղային երկիրը, որ համեմատաբար փոքր տարածություն էր զբաղեցնում Գավառագետի հովտում (ներկա Կամոյի շրջանում), ուներ 22 կիկլոպյան ամրոցներ⁸։ Ռուսա I-ը (730—714), նվաճելով այդ ամրոցները, դրանցից կենտրոնականը (այժմյան Կամո քաղաքի տարածքում) վերակառուցումից հետո վերանվանում է «Խալդի աստծու քաղաք»⁹։ Հավանաբար, Խալդին՝ ուրարտացիների գերագույն աստվածը, փոխարինել է այստեղ մերձսևանյան ցեղամիության ղիսավոր աստծուն, որի անունն էր Նախապես

⁶ Н. В. Арутюнян, Бийнили, էջ 325։

⁷ նույն տեղում, էջ 433, 434—435։

⁸ УКИ, 287. Ս. Գ. Բարխուդարյան, Վելիքունի երկիրը, «Հայաստանի կուլտուրայի պատմության ինստիտուտի աշխատություններ», հատ. 1, Երևան, 1935, էջ 153—204։

⁹ УКИ, 265. Б. Б. Пиотровский, Ванское царство, էջ 32։ Գ. Հ. Միքայելյան, Ուելիքունի երկրի կենտրոնական կիկլոպյան ամրոցը, «Պատմա-բանասիրական հանդես», 1964, № 1, էջ 119—132։

կրելու հիշյալ ամրոցը: Բսկ այս հանգամանքը խոսում է արդեն մերձսևանյան մյուս ցեղային երկրների համեմատությամբ Uelikuni-ի ունեցած առանձնահատուկ դիրքի մասին: Ըստ այսմ, նկատի առնելով ռազմական դեմոկրատիայի փուլում ապրող ցեղերի միություններին բնորոշ «արքայական ցեղի» ինստիտուտը¹⁰, կարող ենք ենթադրել, որ մերձսևանյան *uel ցեղը և նրա Uelikuni ցեղային երկիրը համապատասխան ցեղամիության ներսում ունեցել է արտոնյալ վիճակ (որպես նրա «արքայական» ցեղի և «արքունի» երկրի):

Մեր այս ենթադրության ճշմարտացիությունը կարող ենք հիմնավորել համադրելով ուրարտական ժամանակաշրջանի տեղանվանական տվյալները հայկականի հետ՝ միաժամանակ հենվելով իր անցյալի շուրջ հին հայերի հյուսիս-արևելյան հատվածի հյուսած (և Մովսես Խորենացու միջոցով մեզ հասած) ավանդազրույցների վրա:

Ուրարտական և հայկական ժամանակաշրջանների տեղանվանական տվյալների համադրումից պարզվում է, որ եթե մ. թ. ա. VIII—VII դդ. Uelikuni ցեղային երկիրը բռնում էր Սևանա լճի արևմտյան ափի կենտրոնական մասը՝ միայն, ապա հայկական Գեղաքունի (Գեղարքունի) նույնանուն¹¹ դավառը ներառում էր լճից արևմուտք և հարավ ընկած շրջանների մեծ մասը՝ հատկապես նրանք, որոնք նախկինում կազմում էին Ueduri-Etiuni ցեղամիության «ծովից այսկույս» ընկած չորս ցեղային երկրների տերիտորիան¹²: Ընդ որում Uelikuni > Գեղաքունի անվանումը չորս էր մղել ոչ միայն մյուս երեք ցեղային երկրների անվանումները, այլ հատկացվել էր Սևանա լճին ևս, որը հին հայերին հայտնի էր Գեղափունեաց ծով անվամբ¹³:

Նշանակում է, մերձսևանյան ցեղերի միավորման կենտրոնը՝ ցեղամիության «արքունի» երկիրը եղել է Uelikuni-ն: Իսկապես էլ այս հանգամանքը պարզ կերպով արտացոլված է իր անցյալի շուրջ հին հայերի հյուսիս-արևելյան հատվածի հյուսած այն ավանդազրույցներում, որոնց մեջ կարևոր դերը պատկանում է Գեղամին՝ Գեղաքունի (<Uelikuni) երկրի և նրան իր անունը տված գեղ (*uel-) ցեղի էպոնիմին¹⁴: (Գեղամ անունը պարունակում է նույն գեղ արմատը և -ամ անձնանվանակերտը. հմմտ. Արգամ, Կառնամ, Պասփամ և այլն): Գեղամի և նրա ժառանգների վերաբերյալ Մովսես Խորենացին բերում է հետևյալ տեղեկությունները.

Ի «Իսկ Գեղամ յետ ամաց անցանելոյ ծնաւ զՀարմայ յԱրմաւիր եւ թողեալ զՀարմայ յԱրմաւիր հանդերձ որգւովք բնակել, եւ ինքն գնաց զմիւս լերամբ արեւելեան հիւսիսոյ, յեզր ծովակի միոյ: Շինէ զեզր ծովակին, եւ

¹⁰ Հիշենք «արքայական սկյութներին» սկյութական ցեղամիության մեջ. Արշակունիների ապան ցեղին՝ դահականի մեջ, ասիաներին՝ թուրաականի մեջ:

¹¹ Գր. Ղ ա փ ա ն ց յ ա ն, Ուրարտուի պատմությունը, Երևան, 1940, էջ 182, 187, 196: Гр. Капанцян, նշվ. աշխ., էջ 33—34, 82:

¹² Ս. Տ. Երեմյան, Հայաստանը ըստ «Աշխարհացոյց»-ի, Երևան, 1963, էջ 47:

¹³ «Մովսիսի Խորենացու Պատմության Հայոց», Տիգրիս, 1913, Ա, 3բ:

¹⁴ Н. Адонц, Армения в эпоху Юстиниана, Ереван, 1971, էջ 303: Гр. Капанцян, նշվ. աշխ., т. I, Ереван, 1956, էջ 187:

թողու անդ բնակիչս. եւ յիւր անուն եւ սա զլեառնն անուանէ Գեղ, եւ զշէնսն՝ Գեղարքունի, որով կոչի եւ ծովն»¹⁵:

2 «Աստ ծնաւ (Գեղամը) զորդի իւր զՍիսակ, զայր սէգ եւ անձնեայ, բարեգեղ, կորովաբան եւ զեղեցկաղեղն: Սմա զմեծ մասն ընչից իւրոց տուեալ եւ ծառայս անձինս բազումս՝ սահմանս հատանէ նմա ժառանգութեան ի ծովէն ընդ արեւելս մինչեւ ցդաշտ մի, ուր գետն Երասխ հատեալ զքարանձաւս լերանց՝ անցանէ ընդ խոխոմս ձիգս եւ նեղս, ահագին դնդնջամբ իջանէ ի դաշտն: Աստ բնակեալ Սիսակ՝ լնու շինութեամբ զսահմանս բնակութեան իւրոյ. եւ զաշխարհն կոչէ իւրով անուամբն Սիւնիք. այլ Պարսք յստակադոյնս եւս Սիսական կոչեն: Ի սորա ծննդոց աստ ուրեմն Վաղարշակ, որ առաջին ի Պարթեւաց արքայ Հայոց, գտեալ արս անուանիս՝ տեարս աշխարհին կարգէ, որ է Սիսականդ ազգ. եւ զայս առնէ Վաղարշակ՝ ի պատմութենէն ստուգեալ»¹⁶:

3 «Բայց ինքն Գեղամ դառնայ անդրէն ի դաշտ անդր, եւ առ ոտամբ նորին լերինն ի ձորակի միում ամրոջ շինէ ձեռակերտ մի, եւ կոչէ զանուն նորա Գեղամի, որ յետոյ ի Գառնկայ թոռանէ նորա անուանեցաւ Գառնի»¹⁷:

4 «Իսկ զԴատ ի զաւակէ Գառնկայ, որ ի Գեղամայ, ի վերայ որսոց արքունականաց կարգէ (Վաղարշակը): Որոյ որդի եղեալ Վարժ՝ յանուն նորա անուանի ազգն. բայց այս զկնի, յաւուրս Արտաշիսի»¹⁸:

5 «Ի սորա ծննդոց աստ ուրեմն առ Արտաշիսաւ թոռամբ Վաղարշակայ ոմն Վարաժ անուն պատանի լեալ, աջող յորս եղջերուաց եւ այծեմանց եւ վարազուց, դիպածգութեամբ նետից կորովի զսա ի վերայ որսոց արքունականաց կարգէ, եւ շէնս պարգեւէ նմա առ եզերք գետոյն, որ անուանեալ կոչի Հրազդան: Եւ ի սմանէ ասեն լինել զտունն Վարաժնունի»¹⁹:

6 «Բսկ զՌիշտունիս եւ զԳողթնեցիս գտի պատմեալ ի Սիսականէն արդարեւ հատուած. ոչ գիտեմ, թէ յանուն արա՞նցն զդաւառսն անուանեալ, եւ թէ յանուն գաւառացն զնախարարութիւնսն կոչեցեալ»²⁰:

Ընչպէս ցույց են տալիս բերված հատվածները, ժամանակին գեղ ցեղի գլխավորած մերձսևանյան միության (այն պայմանականորեն կարելի է կոչել նաև «Գեղամի ցեղամիություն») մեջ են ընդգրկված եղել Սևանի ավազանին հարող հետևյալ երկրները ևս. հյուսիսում՝ հետագա Վարաժնունիքը մինչև Գուգարք, արևմուտքում՝ Գառնիի շրջակայքն ու Հրազդան գետի վերին հոսանքի շրջանը մինչև Արարատյան դաշտ²¹, իսկ հարավում՝ հետագա Սյունիքն ու Գողթնը մինչև Արաքս:

¹⁵ Խոբենացի, Ա, Ժր:

¹⁶ Նույն տեղում:

¹⁷ Նույն տեղում:

¹⁸ Նույն տեղում, Բ, է:

¹⁹ Նույն տեղում, Ա, Ժր:

²⁰ Նույն տեղում, Բ, ր:

²¹ Վերջինիս կորիզը կազմող Քրիստոսի երկիրը մերձսևանյան ցեղամիության մեջ ընդգրկվել էր դեռևս մ. թ. ա. VII դարում (տե՛ս Н. В. Арутюнян, Бнаиния, էջ 433—435): Թերևս, մերձսևանյան ցեղերի այս ուղղութիամբ տարածվելու հետևանքը լինի այժմյան Հրազդանի շրջանի հարավ-արևմուտքում գտնվող Աղվերան բնակավայրի անվանումը: Եթե միայն, Աղվերան < *աղուեր-ան, իսկ աղուեր = luer (հմտ. «ծովից այսկույս» գտնվող երկրներից մեկի Lueruni < luer-uni? անվան հետ):

Դեռևս հայ ժողովրդի կաղմավորման ավարտից առաջ մերձսևանյան ցեղամիության այս վերջին ուղղությամբ ընդարձակված լինելու մասին են վկայում մի շարք տեղանվանական տվյալներ ևս: Դրանցից հատուկ ուշադրության են արժանի հարավային Սյունիքի տեղանուններից երկուսը՝ Դեղափունի և Արփոյփա (բնակավայրեր էին Բաղբ և Ճահուկ գավառներում²²): Դրանք համահնչուն են Ueduri-Etiuni-ի «ծովից այսկույս» գտնվող ցեղային երկրներից երկուսի Uelikuni (Գեղաքունի) և Arquaiuni (Arquaiuni) անվանումներին²³: Ինչպես Գր. Ղափանցյանն էր նշում, Սյունիքի հիշյալ տեղանունները ժամանակագրական տեսակետից երկրորդային են մերձսևանյան համապատասխան երկրանունների համեմատությամբ²⁴: Նշանակում է, մ. թ. ա. VI—V դդ. ընթացքում մերձսևանյան ցեղամիության դեպի հարավ ընդարձակվելուն ղուգրնթաց Ուելիկունի (Գեղաքունի) և Արքուքինի ցեղային երկրների հիմնական բնակչությունը հանդիսացած էթնիկական տարրի առանձին հատվածներ ևս շարժվել են հարավ՝ բնակություն հաստատելով հետագա Սյունիքի տարածքում:

Այս տեղաշարժերի կապակցությամբ խիստ ուշագրավ են հետևյալ երկու հանգամանքները: Նախ. Սյունի-Սիսական նախարարական տոհմի էպոնիմ-նախնի Սիսակը աղգակցական-ժառանգական սերտ կապի մեջ է Գեղաքունի երկրի և նրան իր անունը տված գեղ ցեղի էպոնիմ Գեղամի հետ (ընդ որում, հին հայկական ավանդադրույցներում այս հարցն արծարծվել է հենց Գեղաքունի երկրի առնչությամբ. Գեղամը «աստ ծնաւ զորդի իւր գՍիսակ» և նրան «ղմեծ մասն ընչից իւրոց տուեալ»)²⁵: Ապա. հենց մերձսևանյան շրջանների հետ է կապվում նաև այս տոհմի Սյունի < Սիւնի, որից Սյունիք < Սիւնիք անվանումը, որովհետև վերջինիս «ավելի արխաիկ ընթերցումն է «Սեւնիք», որից առաջացել է այժմյան «Սեւան» անունը»²⁶:

Որոշակի տվյալներ կան մերձսևանյան ցեղերի միության՝ արևելյան ուղղությամբ ևս ընդարձակված լինելու վերաբերյալ: Այս տեսանկյունից նայելիս է իր իսկական բացատրությունն ստանում հետագա Գարդման-Շակաշենում բնակված հայերի միջնադարյան սեւորդիք անվանումը, որը մեր պատմիչները բխեցնում էին սրանց իշխող տոհմի ոմն նահապետի Սեւ կամ Սեւուկ անունից²⁷: Անկասկած, սա ոչ թե իրականում գոյություն ունեցած անձնավորություն էր, այլ հայերի սեւորդիք կոչված աղգագրական խմբի՝ անձնավորման ենթարկված բանահյուսական կերպարը, նրա էպոնիմ-նախնին (հմմտ. գեղ և Գեղամ, կաղմուիւ և Կաղմոս, ֆարքվել և Քարքլոս և այլն): Իրականում, թե՛ Սեւ (Սեւուկ), թե՛ սեւորդիք-ֆ անվանումները²⁸ վկայություն-

22 «Ստեփաննոսի Սիւնեաց եպիսկոպոսի Պատմութիւն տանն Սիսական», Մոսկվա, 1861, Հ. ր. ժդ:

23 Հմմտ. նաև Սյունիքի Միւս Բաղբ գավառի Արփոյփ (<*Ադիս-ոյք?) բնակավայրի անվանումը (նույն տեղում, ՀԳ, թ) «ծովից այսկույս» գտնվող չորրորդ ցեղային երկրի Adahuni (<adah-uni?) անվան հետ:

24 Гр. Капанцян, նշվ. աշխ., հատ. II, էջ 172:

25 Խորենացի, Ա, ժբ:

26 Ս. Տ. Երեմյան, Ն. Մառը և VII դարի հայոց «Աշխարհացոյց»-ը, «Մառը և հայագիտության հարցերը», Երևան, 1968, էջ 81:

27 «Վարդանայ վարդապետի Պատմութիւն», Վենետիկ, 1862, ԽԳ: «Պատմութիւն Յովհաննու կաթողիկոսի», Երուսաղեմ, 1867, ԻԶ, ԼԷ:

28 Սեւ (Սեւուկ) և սեւորդիք անվանումները ժագուֆնաբանական կապ չունեն հայերեն:

ներն են դրանց կրողներին ինչպես մերձսևական շրջանների, այնպես էլ Սյունիքի հետ ունեցած առնչության:

Այս առնչությունը դեռևս անցյալ դարի վերջերին արժանացել էր Ղ. Ալիշանի ուշադրությանը: Դրա արդյունքն են նրա հետևյալ տողերը. «...Սե-տև անուն նահապետ մի լինել, յորմէ եւ Սեւորդեացն ազդ, դրակից Սիւ-նեաց. աստ-ուստ թերեւս եւ անուն կղզւոյ ծովուն Գեղամայ Սեւան, եւ ի սմանէ Սիւնիք՝ իրե Սեւունիք (ընդգծումները մերն են—Ս. Պ.)»²⁹: Փաստորեն, գործ ունենք միևնույն՝ սեւ արմատի երեք առանձին տեղայնացումների հետ. առաջինը՝ մերձսևական շրջանում (Սեւ-ան), երկրորդը՝ Սյունիքում (Սեւ-նի > Սիւ-նի, որից Սեւնիք > Սիւնիք), երրորդը՝ Գարգման-Շակաշենում (Սեւ կամ Սեւ-ուկ և սեւ-որդի-ք): Քանի որ հիմք-անվան *սեւ-ը ունի մերձսևա-նյան ծագում, ուստի նրա հայտնվելը ինչպես Սյունիքի, այնպես էլ Գարգման-Շակաշենի տարածքներում պետք է բացատրվի Սևանի ավազանի ցեղերի՝ դեպի հարավ (Սյունիք) և արևելք (Գարգման-Շակաշեն) կատարած տեղա-շարժերով:

Մերձսևական ցեղերի արևելյան ուղղությամբ կատարած տեղաշար-ժերի մասին են վկայում տեղանվանական տվյալները ևս: Դրանցից պետք է ամենից առաջ նշել Մալդէ անվան հնում Արցախի վրա տարածված լինելու փաստը³⁰: Այս անվան տարբերակներով (Մալդ, Սալդ, Ջալդ, այժմ՝ Ջոդ < Ջոդ < Ջոդ < Ջալդ) նախապես կոչվել է միայն Սևանա լճից արևելք և հարավ-արևելք ընկած երկիրը՝ հետագայի «Մալդացւոց իշխանութեան» կենտրոնը³¹: Իշխանությունը գլխավորած «Մալդացի» հին հայկական նա-խարարական տոհմը ազգակից էր Գարգման-Շակաշենում իշխած «Գարգմա-նացի» տոհմին՝ նրա հետ միասին սերված համարվելով Սիսակի զարմ Առա-նից³² (իսկ Սիսակը, ինչպես վերևում տեսանք, Սյունի-Սիսական նախարա-րական տոհմի էպոնիմ-նախնին էր՝ ծնված մերձսևական Գեղաքունի երկ-րում)³³:

Այսպիսով, Հայկական լեռնաշխարհի հյուսիս-արևելքում ուրարտական դերիշխանության վերացումից հետո վերստին զորեղացած մերձսևական ցե-ղամիությունը հաջորդ՝ մ. թ. ա. VI—V դդ. ընթացքում աստիճանաբար իր իշխանությունն է ենթարկում լեռնաշխարհի նորանոր շրջաններ՝ հյուսիսում հասնելով մինչև Գուգարք, արևմուտքում՝ Արարատյան դաշտ, հարավում՝ մինչև Արաքս, իսկ արևելքում՝ Կուր-Արաքսյան հարթավայր:

«սև» (<սեւ><իւրան. syāva «սև») բառի հետ: Դրանք հույնիմաստ են բնկավել հետագա-յում՝ ծնելով ժողովրդական «սև որդիներ» ստուգաբանությունը:

²⁹ Ղ. Ալիշան, Սիսական, Վենետիկ, 1893, էջ 6:

³⁰ Н. А. Дюби, Армения в эпоху Юстиниана, էջ 294: Ս. Ս. Երեմյան, Հայաս-տանը ըստ «Աշխարհացոյց»-ի, էջ 80:

³¹ Ս. Ս. Երեմյան, «Մալդացւոց իշխանութիւն», ՀՍՍՀ ԳԱ «Տեղեկագիր» (հաս. պիտ), 1960, № 7—8, էջ 51:

³² Ինչպես ևսորենացին է վկայում. «Եւ ի սորա (Սիսակի) ծննդոց այս Առան անուանի ևւ րաջ կարգեցաւ կողմնակալ իւրաւոր ի Պաբլուն վաղարշակայ: Ի սորա գաւազաց ասն սերեալ զազկն Ուտեացոց ևւ Գարգմանացոց ևւ Մալդացւոց ևւ Գարդարացոց իշխանու-թիւնսն» (Խորենացի, Բ, ք):

³³ Մերձսևական ցեղերի արևելյան ուղղությամբ կատարած տեղաշարժերի վկայություն-ները պետք է համարել նաև «Մալդից գավառի» համար բնորոշ-բալ տեղանվանակերտով կազմված տեղանունների առկայությունը արևելքից նրան հարող շրջաններում ևս (տես Ստ. Սյունեցի, ՀԳ, և):

Մովսես Խորենացու հաղորդած վերոբերյալ հին հայկական ավանդազրույցներից պարզվում է, որ Հայկազն Գեղամը՝ մերձսևանյան ցեղամիության (և առաջին հերթին նրա իշխող գեղ ցեղի) էպոնիմը, համարվում էր հայրը ոչ միայն Սիսակի, այլև Հարմայի։ Վերջինիս թե՛ անունը և թե՛ Արմավիրում իշխելու հանգամանքը³⁴ (երբ՝ Արմաիր < Արմա-իր, այսինքն՝ «արմա-ցեղ»)՝ հուշում են, որ նա էպոնիմն է Արարատյան դաշտում բնակված արմենական (արմ-ական) էթնիկական տարրի։ Այս առումով պատահական չէ, որ Մովսես Խորենացին Հարմայի որդի (ուրեմն և՛ Գեղամի թոռ) Արամի անունից է բխեցնում հայերին և Հայաստանին օտարներից տրված արանն, Արմենիա անվանումները³⁶։

Ասվածները թույլ են տալիս մերձսևանյան ցեղամիության (էպոնիմը՝ Գեղամ) իշխող ցեղերը համարել արևելաարմենական ցեղերին (էպոնիմները՝ Հարմա և Արամ) ազգակից հնդեվրոպական ցեղեր։ Ընդ որում, նրանց մի մասը, արմենական ցեղերի հետ միասին, պատկանելու էր հայերենակիր այն էթնիկական տարրին (հայերի լեզվական նախնիներ), որը որոշիչ դեր է խաղացել հայերենը Հայկական լեռնաշխարհի նախ՝ միջցեղային հաղորդակցման միջոց, ապա և՛ ընդհանուր խոսակցական լեզու դարձնելու գործում։ Այս պատճառով է հենց, որ հայ ժողովրդական հնագույն ավանդազրույցներում մերձսևանյան ցեղամիության էպոնիմ Գեղամը արմենների էպոնիմների (Արամանյակ, Արամայիս, Հարմա, Արամ³⁷) հետ միասին ընդգրկվել է Հայկի՝ կազմավորված հայ ժողովրդի ընդհանուր էպոնիմ-նախնու, սերունդների ուղղագիծ տոհմաբանության մեջ։

Այս հարցի առնչությամբ տեղին է հիշել Երեմիայի բառարանում որպես «հայ» անվան հոմանիշներ հանդես եկող գեղնի (գղնի) և գեղնիկ բառերը³⁸։ Դրանք ուղղակիորեն առնչվելով գեղ-Գեղափունի-Գեղամ ծագումնաբանական փոխադարձ կապերի մեջ գտնվող շարքին, պետք է դիտվեն որպես հայության միայն մի հատվածին (ազգագրական խմբին) հատկացված անվանումներ։ Ըստ երևույթին, գեղնի, գեղնիկ³⁹ կոչվել է հայ ժողովրդի հյուսիս-արևելյան այն հատվածը, որի նախնիները (ինչպես իշխող հնդեվրոպական, այնպես էլ նվաճված հինկովկասյան ցեղերը) ժամանակին մշտնում էին «Գեղամի ցեղամիության», այսինքն՝ գեղ ցեղի գլխավորած մերձսևանյան միության մեջ։

Մերձսևանյան միության իշխող ցեղերի էթնիկական պատկանելության հարցը պարզաբանելիս մենք որպես ուղեցույցներ ենք ընդունում մի կողմից՝

³⁴ Այս Գեղամ. որպես ասացաք, յետ ամաց կենաց իւրոց ծնաւ զՀարմայ, յետ որոյ կեցեալ էւ այլս եւս՝ եւ մեռաւ եւ հրամայեաց որդւոյ իւրում Հարմայ բնակել յԱրմաիր» (Խորենացի, Ա. Ժբ)։

³⁵ Гр. К а з а н ц я н, նշվ. աշխ., հատ. I, էջ 153—154։

³⁶ Թեև Հարմայ կեցեալ ամս՝ ծնաւ զԱրամ։ Արամայ բազում գործք քաջութեան։ պատմին մարտից նահատակութեան, եւ ընդարձակեւ զսահմանս Հայոց յամենայն կողմանց. որոյ անուն եւ զաշխարհս մեր անուանին ամենայն ազգք, որպէս Յունք՝ Արմէն, իսկ Պարսիկք եւ Ասորիք՝ Արմէնիկո» (Խորենացի, Ա. Ժբ)։

³⁷ Гр. К а з а н ц я н, նշվ. աշխ., հատ. I, էջ 179։

³⁸ Երեմիա վարդապետ, Բաղիբր հայոց, Յալիկոնայ, 1698, էջ 63, 67։

³⁹ Դեղնի, գեղնիկ անվանումների մեջ առկա -նի և -նիկ մասնիկները ցեղանվանակերտներ են (ՀՀՄտ. *սեւ և Սեւնի > Սիւնի, արմլ և արմլնի, արմլնիկ-բ և այլն)։

Թրակա-փոյուզա-հայերենակիր ցեղերի (հինթրակյան ցեղեր⁴⁰) դեռևս մ. թ. ա. XII դարում Հայկական լեռնաշխարհ թափանցելու փաստը⁴¹, մյուս կողմից՝ մերձսևանյան Ueduri-Etiuni ցեղամիության և նրա «ծովից այսկույս» տարածված ցեղային չորս երկրների վերաբերյալ Ս. Տ. Երեմյանի գրած հետևյալ տողերը. «Ueduri-Etiuni անվան ստուգաբանությունը կապվում է Թրակական ցեղերի ներթափանցման հետ Անդրկովկաս և Հայաստան դեռևս VIII դարում մ. թ. ա.: Ueduri-Etiuni անունն էին կրում Սևանա լճի ավազանում գտնվող Ուելիկունի (Ուելիկունի), Լուերունիվ, Ադախունիվ և Արքուրիվ չորս «մերձլճյա երկրները»... Անհրաժեշտ է հիշել, որ Ենթա Թրակերենում նշանակում է «ջուր», հավանորեն *vetu(r), որը ծագում է ընդհանուր հնդեվրոպական <*uedō(r) արմատից: Թրակական այս բառը հիմք է տալիս ենթադրելու, որ Ueduri-Etiuni պետք է նշանակի «մերձլճյա (մերձծովյա) Լտիունի», ձիշտ այնպես, ինչպես Մովսես Խորենացին (Բ, դ) Սևանի առափնյա բնակիչներին անվանում է «ծովեզերեայս»⁴²:

Ասվածներից ելնելով, մենք հակված ենք հինթրակյան (Թրակա-փոյուզա-նախահայկական ընդհանրությունը) ծագում վերադրելու մերձսևանյան ցեղամիության իշխող ցեղերին՝ ի թիվս որում և ցեղամիության «արքայական» գեղ (<*uel) ցեղին, որի երկիրը (Գեղաքունի <Uelikuni) կատարել էր Հայկական լեռնաշխարհի հյուսիս-արևելքի ցեղային մյուս երկրները համախմբած կենտրոնի դերը:

Գեղ (<*uel) ցեղի հնդեվրոպական-հինթրակյան ծագման ապացույց կարող է ծառայել նրա անվան ստուգաբանությունը: Անունն առնչվում է մի կողմից հայերենի (մոռացություն մատնված) գեղ = գաղ «մեծ, խոշոր», իսկ մյուս կողմից՝ ռուսերեն великий, великан, великийի բառերի հետ⁴³: Մինչդրա-

⁴⁰ Հայ ժողովրդի կազմավորմանը նախորդած ժամանակաշրջանի համար Ստրաբոնը, որն ոգտվել է ավելի հին աղբյուրներից, «թրակական» ցեղեր է հիշատակում Հայկական լեռնաշխարհի հյուսիսային, հյուսիս-արևելյան և արևելյան մասերում (տե՛ս Strabo, XI, XIV, 14; XI, V, 2):

⁴¹ Н. М. Дьяконов, Предыстория армянского народа, Ереван, 1968, էջ 117—119, 123—124: «Հայ ժողովրդի պատմություն», հատ. Ա, Երևան, 1971, էջ 230—237: Նույնի՝ Հայ ժողովրդի կազմավորման ընթացքը, «Պատմա-բանասիրական հանդես», 1970, № 2, էջ 37—43: Նույնի՝ Հայկական առաջին պետական կազմավորումները, «Պատմա-բանասիրական հանդես», 1968, № 3, էջ 92:

⁴² Ս. Տ. Երեմյան, Ն. Մարտիկի VIII դարի հայոց «Աշխարհացույց»-ը, էջ 81—82:

⁴³ Հնդեվրոպական ազգակից մյուս լեզուներում ես ասեմ է այս արմատը: Թոխարական դույզ լեզուները (A և B) ունեն wal, walo «արքա, իշխան», բայլյան լեզուները (լիտվերեն և լատիշերեն)՝ valia, vala «ուժ, իշխանություն» նույնածագում բառերը (տե՛ս М. Фасмер, Этимологический словарь русского языка, т. I, М., 1964, էջ 289): Ըստ երևույթին, սրանց մեկ ուրիշ զուգահեռն է ներկայացնում փոյուզական արքաների բառը. βασιλεύς (vaseleu — վազէն-ա՞կ > վազինակ) տիտղոսը, որը հին հույները թարգմանում էին «արքա» (Древнегреческо-русский словарь, т. I, М., 1958, էջ 286): Հավանաբար, դահական-պարթևական (Թոխարական փոխառություն) իրականությանը ևս ծանոթ էր *val արքայական տիտղոսը՝ առկա Վաղարշակ զահանվան մեջ: Գահանունը նշանակելու էր *վաղ-Արշակ, այսինքն՝ «արքա Արշակ» (այս առումով հետաքրքրական է, որ հայ Արշակունիների արքայատոհմի ավանդական հիմնադիրը պատմիչների երկերում կոչվում է մերթ Վաղարշակ, մերթ Արշակ): Ըստ այսմ, ռազմական ղեկավարության փուլում ապրող ցեղերի միությունների՝ բնորոշ «արքայական ցեղի» ինստիտուտի իրողությունից ելնելով, կարող ենք մերձսևանյան գեղ <*uel ցեղի և նրա Գեղաքունի (Uelikuni) երկրի նույնածագում անվանումները համարել վկայությունները այս ցեղի և նրա ցեղային երկրի՝ ցեղամիության ներսում ի սկզբանե ունեցած արտոնյալ վիճակի:

քարյան հայերենում գեղ = գաղ (< 𐭪𐭥𐭫𐭭 -) արմատի զոյություն փաստն են արձանագրել զրաբարյան գեղարդն և գաղգաղել բառերը. գեղարդն «մեծ նիզակ» (երբ՝ արդն «նիզակ, տեգ») ⁴⁴, իսկ գաղգաղել՝ «խոշորել» (կրկնաբանությունամբ գաղ արմատից) ⁴⁵:

Մեր կարծիքով, մերձսևանյան ցեղամիության՝ հինթրակյան ցեղերի գլխավորությամբ կազմավորված լինելու մասին է վկայում Ստրաբոնի այն հաղորդումը, որի մեջ խոսվում է նաև Անդրկովկասում «ամազոնների» և «էվբեյացիների» հարևանությամբ բնակված «թրակացիների» մասին: Ահա այն. «Իարգուրացիները ամազոնների հետ, ինչպես ասում են, այս տեղերն (հետագա Աղվանքից հյուսիս—Մ. Պ.) են հասել Խեմիսկիրեից: Բայց հետո նրանք ապստամբություն բարձրացրին և սկսեցին կովել ամազոնների դեմ ինչ-որ թրակացիների և էվբեյացիների հետ միասին (որոնք իրենց քոչերով հասել էին մինչև այդ տեղերը): Այնուհետև, զաղարեցնելով պատերազմը՝ նրանք հաշտություն կնքեցին վերոհիշյալ պայմաններով. իրար հետ կշիվեն միայն երեխաներ ունենալու համար, իսկ կապրի յուրաքանչյուր ցեղ փոքնուրույն կերպով» ⁴⁶:

Իսկ. այստեղ հիշատակված ցեղերի մասին: Դրանցից զարգարացիները (զարգարները) շեշենա-ինգուշների նախնիներից էին և բնակվում էին Կովկասյան գլխավոր լեռնաշղթայի հյուսիսային փեշերին ⁴⁷: Նրանց հարևան ամազոնները հետագա Աղվանքի հյուսիս-արևմուտքում բնակված ալազոններն են (սրանց անունն է կրում Ալազան գետը), որոնք ամազոններ են դարձել լեռնական առասպելաբանության ազդեցությամբ՝ ամազոն և ալազոն անվանումների հնչյունական նմանության հոդի վրա (Aλαζώνες < Aλαζωνες ⁴⁸): Նույն կերպ, գրական միջնորդության հետևանքով են բերված հատվածում հայտնվել էվբեյացիները: Հունական էվբեյա կղզու հնագույն բնակիչները կոչվում էին արանաներ (Ἄρανες), իսկ կղզին ինքը՝ Արանտիս (Ἀραντία ⁴⁹): Այս անվանումները շատ մոտ են հնչում հետագա Մեծ Հայքի Սյունիք և Արցախ նահանգների Հարանդ ու Մեւս Հարանդ կոչված էից գավառների անվանումներին ⁵⁰: Հենց այս Հաբանդների բնակիչներին է իրականում վերաբերելու Ստրաբոնի կողմից աբանտ-էվբեյացիներին վերագրված վերոհիշյալ տեղեկությունը:

Ինչ վերաբերում է Հաբանդի բնակիչների հետ միասին որպես զարգարացիների դաշնակիցներ ամազոն-ալազոնների դեմ հանդես եկած «ինչ-որ թրակացիներին», ապա դրանք լինելու էին Հաբանդների (այսինքն՝ հարավ-արևելյան Սյունիքի և հարավային Արցախի) ու հյուսիս-արևմտյան Աղվանքի (որտեղ ապրում էին ալազոնները) միջև բնակված այն ցեղերը, որոնք մ. թ. ա. 31—V դդ. մտնում էին մերձսևանյան ցեղամիության մեջ ⁵¹:

⁴⁴ Հ. Ա ճ ա ո յ ա ն, Հայերեն արմատական բառարան, հատ. Ա, Երևան, 1971, էջ 309, 333:

⁴⁵ Երևմտա վարդապետ, Բառգիրք հայոց, էջ 60:

⁴⁶ Strabo, XI, V, 2.

⁴⁷ В. Б. Виноградов, Тайны минувших времен, М., 1966, էջ 117—122:

⁴⁸ К. В. Тревер, Очерки по истории и культуре Кавказской Албании IV в. до н. э.—VII в. н. э., М.—Л., 1959, էջ 50:

⁴⁹ Древнегреческо-русский словарь, т. I, էջ 13:

⁵⁰ Ս. Ն Ր Է Մ Յ ա ն, Հայաստանը ըստ «Աշխարհացոյց»-ի, էջ 61, 70:

⁵¹ Հետ երևույթին, տվյալ դեպքում նկատի պետք է առնվեն ոչ թե մերձսևանյան ցե-

Հայկական լեոնաշխարհի հյուսիս-արևելյան շրջաններում հինթրակյան էթնիկական տարրը հաստատվել էր նաև հյուսիսից կառարած տեղաշարժերի միջոցով: Դրանցից էին, օրինակ, կիմերների, տրերների և նրանց ազգակից մյուս ցեղերի այն հատվածները, որոնք Հյուսիսային Կովկասից Անդրկովկաս ներխուժելուց հետո՝ այստեղ էին ապաստանել սկյութների ձնշման տակ (մ. թ. ա. VIII—VII դդ.)⁵²: «Այս կապակցությամբ,—գրում է Ս. Տ. Երեմյանը,— հետաքրքրություն է ներկայացնում հենց Թրիալեթի, հայկ. Թոեզք, անունը (այժմ Ծալկայի շրջանը, Գոմարեթիից հյուսիս): Այս անվան ավելի արխաիկ ձևը պետք է լինի «թրիար» (<«թորի+ար»), որը պահպանվել է Պլինիոսի մոտ՝ regio Thriarei: Վրացերենի տեսակետից այս վերջինիս օրինաչափ ձևն է «թրիալ-եթի»: Այս նույն էթնիկական անունը պահպանվել է Թարթառ գետի հովտում, հենց այդ գետի անվան հնագույն ձևում՝ Տրտու, Տրտուական և նույն տեղում գտնվող Տոի գավառի անվան մեջ (ուրարտ. Teriani, միջին գարերում Զրաբերդ գավառը): Մեջ բերված անուններում պահպանվել է տրերների՝ թրակական ցեղերից մեկի անունը»⁵³:

Ընդհանրապես, հայերենակիր էթնիկական տարրին ազգակից և Հայկական լեոնաշխարհ հյուսիսից թափանցած ցեղերի (ի թիվս որում և «թրակակիմերների»)՝ հայ ժողովրդի էթնոգենեզիսին բերած մասնակցությունը իր դրոշմն էր թողնելու (և թողել է) նաև հայոց լեզվի վրա: Այս հարցի կապակցությամբ ուշագրավ են Գ. Բ. Զահուկյանի այն տողերը, որոնք վերաբերում են հայերեն հաբալ բառի և նրա իրանական *paurna* համարժեքի ստուգաբանությանը: Վերջինիս «... սկբնական իմաստն է «առաջին», որը հետագայում ստացել է նաև «հարավային» իմաստը: Հետադոտողները բառիմաստի այսպիսի անցումը բացատրում են նրանով, որ իրանական ցեղերի վաղ շարժման ուղղությունը եղել է հարավ, այսինքն՝ «առաջ շարժվել» և «հարավ շարժվել» նշանակել են նույն բանը: Ավեստյան բառի աղբյուրն է հ. -հ. *per-* արմատից կազմված **perəu-* բաղադրությունը, որը հավասարապես կարող էր տալ հայ. հաբալ (սեռ. հաբալու) բառը... ներկա ստուգաբանությունը հիմք է տալիս հայերի՝ դեպի հարավ կատարած (իրանական ցեղերի հետ միասին) վաղ տեղաշարժեր ենթադրելու համար»⁵⁴: Այսպիսի մի եզրակացության է հանգեցնում նաև հայերեն առաջ բառի ստուգաբանությունը: Բառն ինքնին նշանակում է «դեպի աջ», սակայն այստեղ «աջ»-ի տակ պետք է նկատի առնել հենց «հարավ»-ը: Հայտնի է, որ հնում բոլոր արևապաշտ ժողովուրդների համար զործածական էր դեպի արևելք կողմնորոշումը: Համաձայն այս կողմնորոշման, «հյուսիսը» նույնանում է «ձախ», իսկ «հարավը»՝ «աջ» հասկացությունների հետ⁵⁵: Բնականաբար, հարավ-աջ կողմը «առջև» կարող էր

դամիության մեջ մտած ցեղերն ընդհանրապես, այլ այդ ցեղերից նրանք. որոնք հանդիսանում են հետադայում այդ նույն տարածքում (Հաբանդների և հյուսիս-արևմտյան Աղվանքի միջև), այսինքն՝ Գարգաման-Շակաշենում բնակված սևորդիների նախնիները:

52 Ս. Տ. Երեմյան, Կիմերական և սկյութական ցեղերի արշավանքները և Սևրատուի ու Ասորեստանի պայքարը քոչվորների դեմ, «Պատմա-բանասիրական հանդես», 1968, № 2, էջ 92:

53 Նույն տեղում (գուցե թե տրերների ցեղանվան հետ են առնչվում նաև Սյունիքի *Srlyunif* և *Srbya* տեղանունները—Ս. Ս. Սյունեցի, ՀԳ, Կ, Թ):

54 Գ. Բ. Զահուկյան, Ստուգաբանություններ, «Լրաբեր հասարակական գիտությունների», 1973, № 6, էջ 20—21:

55 Այսպես օրինակ, արաբերենում *imlā* տեղանունը բառացիորեն նշանակում է «աջի

լինել միայն նրանց համար, որոնք շարժվում էին դեմքով դեպի հարավ-աջ ուղղությամբ, այսինքն՝ գալիս էին հյուսիս-ձախ կողմից: Իսկ դա հենց այն ուղղությունն էր, որով հայկական լեռնաշխարհ էին թափանցել թրակա-կի-մերական ցեղերը:

Անտարակույս, մերձսևանյան ցեղամիության իշխող հինթրակյան ցեղերի մեջ (հատկապես նրա գոյության երկրորդ փուլում՝ մ. թ. ա. VI—V դդ.) գերակշռողը եղել են հայերենակիր ցեղերը՝ հայերի լեզվական նախնիները: Առաջին հերթին սրանով պետք է բացատրել նախկինում այս ցեղամիության մեջ մտած շրջանների բնակչության արագ հայացումը Երվանդունիների Այրարատյան թագավորության գոյության ժամանակաշրջանում (մ. թ. ա. IV—III դդ.)⁵⁶: Մյուս պատճառներից կարելի է նշել ցեղամիության հայերենակիր ցեղերին և նրանց թրակա-փոյուզական ազգակիցներին այն ժամանակաշրջանի համար բնորոշ սերտ կապը ինչպես լեզվի⁵⁷, այնպես էլ կենցաղի, հասարակական ինստիտուտների և դիցաբանության-գաղափարախոսության բնագավառներում:

Այսպիսով, բավականաչափ տվյալներ ունենք Հայկական լեռնաշխարհի հյուսիս-արևելքում հինթրակյան (թրակա-փոյուզա-նախահայկական) ցեղերի առաջին ալիքի թափանցման ժամանակաշրջանը թվագրելու մ. թ. ա. VIII դարով, այսինքն՝ այն ժամանակաշրջանով, որն անմիջապես նախորդում է նրանց գլխավորած մերձսևանյան միության գոյության առաջին («ուեդուրի-էթիունյան» — մ. թ. ա. VIII—VII դդ.) փուլին: Հայ ժողովրդի կազմավորման պրոցեսի մեջ նրանց ընդգրկումը պետք է թվագրել մ. թ. ա. VI—V դդ., այսինքն՝ այն ժամանակաշրջանով, որը համապատասխանում է մերձսևանյան միության գոյության երկրորդ («վաղհայկական») փուլին: Իսկ նրանց գլխավորած ցեղամիության մեջ ընդգրկված ցեղախմբի (նախկինում տարածագում և տարալեզու ցեղերի) վերածումը կազմավորված հայ ժողովրդի ազգորական խմբերից մեկին վերջնականապես տեղի է ունեցել մ. թ. ա. IV—III դդ., այսինքն՝ այն ժամանակաշրջանում, երբ գոյություն ուներ Երվանդունիների Այրարատյան թագավորությունը:

(երկիր)»՝ պարունակելով նաև «հարավի (երկիր)» իմաստը: Շամ (Ասորիք, Սիրիա) տեղանունը համապատասխանաբար նշանակում է «ձախի (երկիր)» կամ «հյուսիսի (երկիր)»: Այս անվանումները հիմնավորվում են նրանով, որ եմենը գտնվում է Արաբիայի հարավում, իսկ Շամ-Ասորիքը՝ նրանից հյուսիս (տե՛ս E. A. Беляев, Арабы, ислам и Арабский халифат в раннее средневековье, М., 1966, էջ 36): Հմմտ. նաև հին հնդկերեն dakṣiṇa (= հուն. δεξιός, լատ. dexter «աջ») բառի զույգ իմաստները՝ «հարավ» և «աջ»:

⁵⁶ Մ. թ. ա. II դարի սկզբի Հայաստանի բնակչությանը Ստրաբոնը բնութագրում է «բոլորը միալեզու են» բառերով (Strabo, XI, 14, 5):

⁵⁷ Է. Կավենյակը Հայկական լեռնաշխարհում հայերենի տարածման փաստը կապում է հինթրակյան ցեղերից հատկապես տրերների հետ (E. Cavaignac, L'origine des Arméniens, «Revue hittite et asianique», XXI, 72, 1963, էջ 47—54): Այս տեսակետն ընդունելիս պետք է նկատի ունենալ, որ ինչպես տրերները, այնպես էլ թրակական և փոյուզական ուրիշ ցեղեր Հայկական լեռնաշխարհում հայերենակիր ցեղերի նման կարող էին կարևոր դեր խաղալ տեղի բազմալեզու բնակչության համար հայերենը նախ միջցեղային հաղորդակցման միջոց, ապա և՛ համընդհանուր խոսակցական լեզու դարձնելու գործում:

СОЮЗ ПРИСЕВАНСКИХ ПЛЕМЕН НА СЕВЕРО-ВОСТОКЕ АРМЯНСКОГО НАГОРЬЯ

(VI—V вв. до н. э.)

С. Г. ПЕТРОСЯН

(Резюме)

В урартских клинообразных надписях VIII—VII вв. до н. э. упоминается племенной союз Уедури-Этиуни, локализуемый в бассейне озера Севан. Этот союз после падения Урарту укрепился и стал расширяться во всех направлениях. В присеванском объединении господствующее положение занимало племя **uel* (арм. *гел*, *գել*), которое первоначально жило в стране *Уеликунни* (арм. *Գեղարունի*) на западном берегу озера. В древнеармянских эпических сказаниях эпонимом племени гел и страны Телакуни является *Гелам* (*Գեղամ* < *гел* + *ам*). Он считается отцом и предком эпонимов тех нахарарских родов древней Армении, которые происходят от родо-племенной знати присеванского союза.

В этот племенной союз на северо-востоке Армянского нагорья входили как представители древнекавказского автохтонного населения, так и пришлые фрако-фригийские и родственные им протоармянские племена (т. е. племена—носители протоармянского языка). Позже, во время существования Айраратского царства Ервандидов (IV—III вв. до н. э.), все они вошли в состав армянского народа, образовав особую этнографическую группу. Может быть, именно эта северо-восточная этнографическая группа древних армян называлась *гелни*, *гелник* (*գեղնի*, *գեղնիկ* —*ни*, *-ник* — этнонимические суффиксы) по имени гелов, главного племени присеванского объединения. Интересно, что в словаре Иеремии эти имена приводятся как синонимы самоназвания армян (*հայ*).